



**BAB 1**

# **PENDAHULUAN**

## 1.1 Pengenalan kepada Kajian Pengesanan Graduan KPM

Kaji selidik Kementerian Pendidikan Malaysia (KPM) yang dijalankan secara atas talian telah bermula pada tahun 2006. Tujuan utama kajian ini dijalankan ialah bagi melihat status pekerjaan graduan baru menjelang musim konvokesyen masing-masing, iaitu sama ada bekerja, melanjutkan pengajian atau masih aktif mencari pekerjaan. Tumpuan kajian adalah kepada graduan peringkat diploma dan ke atas. Walaupun begitu, semua graduan peringkat sijil UA, politeknik, kolej komuniti dan sebahagian graduan peringkat sijil IPTS turut juga menyertai kajian ini.

IPT yang menyertai kajian akan membekalkan maklumat asas graduan iaitu maklumat diri dan latar belakang pengajian sebelum kajian dibuka kepada para graduan. Data asas yang dibekalkan oleh IPT tidak boleh diubah oleh responden kajian.

## 1.2 Metodologi Kajian

Data asas graduan yang layak berkonvokesyen terlebih dahulu dibekalkan oleh IPT masing-masing dan dimuatnaik ke dalam sistem sebelum dibuka untuk graduan menjawab. Lazimnya, sistem kajian akan dibuka dua ke tiga minggu sebelum tarikh konvokesyen dan akan ditutup seminggu selepas tarikh tamat konvokesyen. Walaupun demikian, pihak IPT boleh membuat perubahan tarikh buka dan tutup sistem kajian ini mengikut kesesuaian masing-masing dengan meminta kebenaran dari pihak KPM.

Soal selidik kajian ini dipaparkan dalam laman web dan boleh dicapai melalui 'graduan.moe.gov.my'. Setiap IPT bertanggungjawab memaklumkan kepada masing-masing graduan untuk memberi respons kepada kajian ini. Data graduan dan data responden yang lengkap akan diberi kepada IPT terbabit setelah sistem ditutup untuk tujuan analisis lanjut oleh IPT.

## 1.3 Struktur Soal Selidik Kajian Pengesanan Graduan 2017

Struktur soal selidik kajian adalah sama seperti tahun-tahun sebelumnya. **Bahagian A** mengandungi maklumat latar belakang asas dan akademik para graduan yang dibekalkan oleh masing-masing IPT.

**Bahagian B** merupakan soalan berkaitan status pekerjaan terkini, sama ada bekerja sepenuh masa atau bekerja separa masa, tidak bekerja atau lain-lain. Manakala **bahagian C** adalah soalan berkaitan maklumat pekerjaan graduan seperti taraf pekerjaan, kumpulan pekerjaan utama, sektor pekerjaan, pendapatan bulanan graduan dan sebagainya.

Bagi graduan yang belum bekerja, mereka perlu menjawab soalan-soalan yang berkaitan di **Bahagian D**. **Bahagian E** dikhususkan untuk graduan yang melanjutkan pengajian ssejurus selepas tamat pengajian.

Maklum balas graduan berkaitan kandungan kurikulum, sistem penilaian, tenaga pengajar dan kemudahan prasarana serta perkhidmatan bimbingan dan kaunseling yang disediakan di IPT masing-masing dimuatkan di **Bahagian F**. Manakala persepsi graduan mengenai keberkesanan sistem pengajian dan kesediaan diri bagi menghadapi cabaran dunia pekerjaan terkandung dalam **Bahagian G**.

#### 1.4 Penyertaan IPT dalam Kajian Pengesanan Graduan KPM 2017

Sebanyak 414 IPT telah menyertai Kajian Pengesanan Graduan KPM pada tahun 2017 berbanding 401 IPT pada tahun 2016. Semua UA, politeknik dan kolej komuniti yang mengeluarkan graduan pada 2017 telah menyertai kajian ini, iaitu 20 buah UA, 32 politeknik dan 88 kolej komuniti. Bagi IPTS pula, sebanyak 264 buah telah menyertai kajian pada tahun 2017 berbanding 255 buah pada tahun 2016. Di samping itu, terdapat sebanyak 10 buah IPT lain turut menyertai kajian ini pada tahun 2017.

Senarai IPT yang mengambil bahagian dalam kaji selidik 2017 diterakan pada **Lampiran 1**.

#### 1.5 Susunan Buku Laporan 2017

Format laporan 2017 ini diteruskan seperti tahun-tahun sebelumnya, iaitu dalam bentuk grafik dan jadual lengkap. Pada bahagian awal laporan ini disisipkan laporan berbentuk infografik mengenai trend keluaran dan status pekerjaan bagi tempoh lima tahun kebelakangan ini, iaitu dari tahun 2013 hingga 2017 agar para pembaca mendapat perspektif yang lebih jelas tentang kebolehdapatan kerja para graduan sempena musim konvokesyen masing-masing.

Laporan Kajian Pengesanan Graduan ini terdiri dari tujuh bab keseluruhannya, iaitu **Bab 1** adalah pendahuluan yang merangkumi struktur soal selidik, penyertaan IPT dalam kajian ini dan profil graduan. **Bab 2** memaparkan corak keluaran graduan mengikut IPT, peringkat pengajian, kewarganegaraan dan jantina bagi UA, IPTS, politeknik, kolej komuniti dan IPT lain.

**Bab 3** memberi fokus kepada status pekerjaan graduan mengikut peringkat pengajian secara lebih terperinci. Manakala **Bab 4** adalah maklumat pekerjaan seperti taraf pekerjaan, kumpulan dan sektor pekerjaan, pendapatan bulanan serta sektor ekonomi bagi graduan 2017 yang bekerja.

Maklumat graduan 2017 yang melanjutkan pengajian sejeurus selepas tamat pengajian dipaparkan dalam **Bab 5**. Manakala **Bab 6** mengandungi maklumat graduan yang belum bekerja, iaitu sebab belum bekerja, kadar belum bekerja mengikut bidang pengajian, peringkat pengajian dan sebagainya.

**Bab 7** mengandungi laporan berkaitan keluaran dan maklumat pekerjaan graduan (warganegara) bagi kumpulan berfokus, iaitu graduan yang bekerja sendiri, graduan Orang Kurang Upaya (OKU) dan graduan berketurunan Orang Asli.

#### 1.6 Kadar Respons Kaji Selidik 2017

Pada tahun 2017 seramai 264,334 responden daripada 299,635 graduan telah menyertai kaji selidik dengan memberi kadar respons sebanyak 88.22 peratus. Semua jenis IPT mencatat kadar respons melebihi 80.0 peratus, dengan peratus tertinggi adalah graduan IPT lain, iaitu sebanyak 94.97 peratus, diikuti UA (94.30 peratus), kolej komuniti sebanyak 92.66 peratus, politeknik (87.33 peratus), dan IPTS sebanyak 81.60 peratus. Kadar respons bagi setiap IPT adalah seperti dalam **Lampiran 1**.